



ДАРА ДАНА

6-БЕТ | ТҰЛҒА



ЖҮЗ ЖЫЛ БОЙЫ
ЖАЗУМЕН ЖАҒАЛАСЫП...

10-БЕТ | РУХАНИЯТ



Қасым-Жомарт ТОҚАЕВ, ҚАЗАҚСТАН РЕСПУБЛИКАСЫНЫҢ ПРЕЗИДЕНТІ:

Көптеген елдің, тіпті, көрші елдердің өзінде ірі кәсіпкерлер мемлекетке алақан жаймайды. Керісінше, туған елін дамытуға өз еркімен қыруар қаржы жұмсайды. Осы елде кәсібін жасап, байыған адамдар қара басының ғана емес, елдің де қамын ойлауға тиіс деп санаймын. Олар жеке мүддесін қоғам мүддесімен үйлестіре білуі қажет. Елге жанашыр іскер азаматтар бізде де аз емес. Мұндай азаматтар қоғамға қажетті көптеген жобаға қаржы салып, игі істердің басы-қасында жүр. Қайырымдылық және волонтерлік бастамаларға демеушілік жасап келеді. Мемлекет те отаншыл азаматтарды өзгелерге үлгі етіп, оларға қолдау көрсетеді.

№41
(4629)
Сенбі
6 сәуір
2024 жыл



ASTANA



РЕСПУБЛИКАЛЫҚ ҚОҒАМДЫҚ-САЯСИ ГАЗЕТ

A Q S H A M Y

1990 ЖЫЛҒЫ 13 ҚАЗАННАН БАСТАП ШЫҒАДЫ



КОМЕККЕ ҮЙ САЛЫНАДЫ

«Қазақстан халқына» қоры арқылы су тасқынынан зардап шеккендерге 630 миллион теңгеден аса қайырымдылық көмек жасалды.

«Қазақстан халқына» қоғамдық қоры бейжай қарамайтын қазақстандықтардың су басқан өңірлерде тұратын отандастарына көмектесуге деген ұмтылысын назарға ала отырып, тиісті қаражатты жинауға дайын екенін мәлімдеді.

Қор Мемлекет басшысы Қасым-Жомарт Тоқаевтың табиғи апаттан зардап шеккен барлық тұрғындар мен өңірлерге барынша қолдау көрсетуге шақыруын қолдай отырып, ауылдық жерлерде жалпы сомасы 5 млрд теңгеге 200 үй салуды қаржыландыратынын хабарлады.

«Біз барлығын ашық түрде жүргіземіз және егжей-тегжейлі есеп береміз. Қордың шоттарына компаниялар мен жеке тұлғалардан 630 млн теңгеден астам сомаға қайырымдылық жарналары түсті. Бұл қаражат 1-30 сәуір аралығында жергілікті атқарушы органдардың қолдауымен зардап шеккендерге ауылдық жерлерде тұрғын үй салуға жіберіледі» делінген хабарламада.

ЕЛ БОЛЫП АПАТТЫ ЕҢСЕРУІМІЗ КЕРЕК

Мемлекет басшысы Қасым-Жомарт Тоқаев Батыс Қазақстан облысына жұмыс сапарымен барды. Президент сапар барысында өңірдің қарғын су басқан аумақтарын тікұшақпен аралап көріп, эвакуацияланған тұрғындармен кездесті. Сондай-ақ төтенше жағдайлар жөніндегі жедел штабтың отырысын өткізді. «Бірқатар аймақты қарғын су басып қалды. Кейбір жерде тасқын су көтеріліп жатыр. Бұл – табиғи апат. Қысқасы, алдымызда тұрған жұмыс өте ауқымды. Бәріміз бір ел, бір ұжым болып осы апатты еңсеруіміз керек. Басқа жол жоқ. Тасқын судың салдарын жою үшін нақты шаралар қолға алынды» деп мәлімдеді ел Президенті төтенше жағдай жөніндегі жедел штабтың отырысында.



ЖҮРГІНШІЛЕР ЖОЛЫ ЖАБЫЛАДЫ

«Астана Опера» мемлекеттік опера және балет театрының жанындағы жерүсті жаяу жүргіншілер өткелі реконструкциялау жұмыстарын жүргізуге байланысты 5 сәуірден бастап толығымен жабылады.

Елордалық Көлік және жол-көлік инфрақұрылымын дамыту басқармасы Полиция департаменті әкімшілік полиция басқармасының келісімі бойынша демонтаждау жұмыстары кезеңінде Д.Қонаев көшесінің Қабанбай батыр даңғылынан Тұран даңғылына дейінгі жол бөлігі де жабылады. Маршруттардың қозғалыс сызбаларын өзгерту туралы «City Transportation Systems» ЖШС ресми сайтында (cts.gov.kz), Facebook және Instagram әлеуметтік желілерінде танысуға болады.

АСТАНАДАН – ӨҢІРЛЕРГЕ...

Астанадан су тасқынынан зардап шеккен өңірлерге 250 тоннаға жуық гуманитарлық көмек жөнелтілді.

Елордада 9 гуманитарлық көмек қабылдау пункті бар, жинауға 30-ға жуық ерікті ұйым атсалысып жатыр. Күн сайын 200-ден астам ерікті қажетті заттарды сұрыптап, жөнелтеді. Ниет білдірушілер жылы киім-кешек, азық-түлік, дәрі-дәрмек, алғашқы қажеттілік заттарын әкелуде.

Апапат партиясының Астана қалалық филиалы «Жастар

рухы» жастар қанатымен, қала әкімдігінің қолдауымен «Астана жастары» ЖРО еріктілерімен, қалалық мәслихат депутаттары, қоғам қайраткерлері, үкіметтік емес ұйымдар, шағын, орта және ірі бизнес өкілдері 250 тоннаға жуық гуманитарлық көмек жинады.

(Соңы 4-бетте)



ВАЛЮТА
БАҒАМДАРЫ

€ EUR/KZT 480.83 \$ USD/KZT 447.53 ₸ RUB/KZT 4.84 ¥ CNY/KZT 61.85

t.me/elordainfo

www.astana-akshamy.kz

№41 (4629) 06/04/2024 Сенбі

Төлен ТІЛЕУБАЙ

(Соңы. Басы 1-бетте)

**АУМАҚТАРДЫ
ТІКҮШАҚПЕН АРАЛАДЫ**

Мемлекет басшысының Батыс Қазақстан облысына жұмыс сапары қарғын су басқан аумақтарды тікұшақпен аралап көруден басталды. Қасым-Жомарт Тоқаев Теректі, Сырым және Қаратөбе аудандарындағы қалыптасқан жағдаймен танысты.

Облыс әкімі Нариман Төреғалиев Президентке бүгінде 6 аудан мен Орал қаласын су басқанын баяндады. Қарғын су 552 тұрғын үйге, 427 саяжай теліміне зиян келтірген. Өңір басшысының айтуынша, су тасқынына қарсы шараларға 1911 адам, 332 техника, 101 мотопомпа, 1 тікұшақ жұмылдырылған. Сонымен қатар құтқару жұмыстарына Алматы және Маңғыстау облыстарының құтқарушылары атсалысып жатыр. Қарғын су басқан аумақтардан 6505 тұрғын көшірілген, жедел-эвакуациялау пункттері құрылған. Зардап шеккендерге біржолғы материалдық көмек көрсету үшін жергілікті бюджет есебінен 63 миллион теңге қаржы бөлінді. Су айдау, нысандардың жан-жағын топырақпен қоршау және су жүретін құбырларды кеңейту жұмыстары жүргізіліп жатыр.

**ЭВАКУАЦИЯЛЫҚ
ПУНКТКЕ БАРДЫ**

Мемлекет басшысы БҚО Қаратөбе ауданындағы эвакуациялық пунктке барды. Президент су басқан аумақтарды тікұшақпен аралап шыққаннан кейін аудан орталығындағы Қажым Жұмалиев атындағы мектеп-гимназия базасында орналасқан эвакуациялық пунктке барды. Мемлекет басшысы гуманитарлық көмекті тарататын пункттің жұмысымен танысып, су тасқынына байланысты жақын маңдағы ауылдардан көшірілген тұрғындармен кездесті.

Қасым-Жомарт Тоқаев тұрғындармен әңгімелесу барысында мұндай көлемдегі тасқынның бұрын-соңды болмағанына назар аударды. Оның айтуынша, осыған ұқсас жағдай 1994 жылы болған. Бірақ биылғы тасқын одан да асып түсті. Президент шығындарды өтеу үшін мемлекет барлық қажетті шараны қабылдайтынын айтты.

«Хал-жағдайларыңызды білу үшін арнайы келіп отырмын. Бұл – бұрын-соңды болмаған үлкен табиғи апат. Сондықтан бәріміз бір ел, бір халық болып әрекет етуіміз керек. Мемлекет, Үкімет баршаңызға қол ұшын береді. Материалдық, қаржылық көмек көрсетеді. Оған еш алаңдамаңыздар. Бәрі дұрыс болады» деді Президент. Кездесуде жергілікті тұрғын-



ЕЛ БОЛЫП АПАТТЫ ЕҢСЕРУІМІЗ КЕРЕК



дар Жақсыбай және Қалдығайты өзендеріне көпір салып беруді, сондай-ақ ауыл маңындағы бөгеттерді жаңғыртуды сұрады. Мемлекет басшысы аталған мәселе бойынша Үкіметке тиісті тапсырма беретінін жеткізді. Сонымен қатар қарғын суды халықтың игілігіне пайдалану қажет екенін атап өтті.

**ЖЕДЕЛ ШТАБ
ОТЫРЫСЫН ӨТКІЗДІ**

Президент Қасым-Жомарт Тоқаевтың төрағалығымен БҚО-дағы су тасқынына байланысты төтенше жағдай жөніндегі

жедел штабтың отырысы өтті.

«Қазір тиісті мекемелердің бәрі белсенді түрде жұмыс істеп жатыр. Бірқатар аймақты қарғын су басып қалды. Кейбір жерде тасқын су көтеріліп жатыр. Бұл – табиғи апат. Қысқасы, алдымызда тұрған жұмыс өте ауқымды. Бәріміз бір ел, бір ұжым болып осы апатты еңсеруіміз керек. Басқа жол жоқ. Тасқын судың салдарын жою үшін нақты шаралар қолға алынды. Қауіп-қатердің алдын алу жұмыстары атқарылуда. Менің тапсырмам бойынша облыстардың әкімдері жұмысқа белсенді кірісті» деді Президент.

Мемлекет басшысы су тасқынына қатысты жағдай әлі де өте күрделі екенін атап өтіп, мұндай көлемдегі тасқынның бұрын-соңды болмағанына назар аударды. Оның айтуынша, осыған ұқсас жағдай 1994 жылы болған. Алайда қазіргі су тасқыны одан әлдеқайда ауқымды.

«Мен зардап шеккен аудандарды аралап шықтым. Апаттың ауқымын, шығынды көріп отырмын. Қаншама дүние-мүлік, электр желілері судың астында қалды. Жолдар мен көпірлер шайылып кетті. Барлық негізгі мәселе

шешілгеннен кейінгі ең басты міндет – қайта қалпына келтіру. Үкіметке жаңа типтегі үйлер салу немесе бұрыннан бар үйлерді реконструкциялау жөнінде арнайы жоспар әзірлеуді тапсырдым. Бұл мәселені оңтайлы шешеміз деп ойлаймын. Ахуалдың ауыр екенін бұған дейін де айттым. Үкіметтің, Республикалық штабтың жетекшілігімен облыс әкімдері бұл міндетті дұрыс атқарады деп санаймын» деді Президент.

Мемлекет басшысы облыстағы ауа райы болжамының қолайсыздығын атап өтіп, су тасқыны жағдайының ушығуына дайын болу қажет екенін айтты.

«Бұл табиғи құбылыс екенін бәріміз түсінеміз. Қардың еруі және тоңның қалың болуы салдарынан топырақтағы ылғал мөлшері жоғары болды. Содан кейін күн күрт жылынып, жауын-шашын жиіледі. Өкінішке қарай, биыл осы факторлардың барлығы қабаттасып кетті. Бұдан сабақ алуымыз керек. Су тасқыны кезеңіне жыл сайынғы дайындық жұмыстары жаз-қаз мезгілдерінде басталып, үш бағытта жүргізілуі қажет. Ең алдымен, бұл – болжам, сараптама жасау сипатындағы шаралар. Гидрометеорологиялық қызмет болжам деректерін мұқият талдап, алдағы су тасқыны кезіндегі жағдайдың өрбу сценарийлерін дайындауға тиіс» деді Қасым-Жомарт Тоқаев.

Сонымен қатар Мемлекет басшысы су тасқынының кері әсерін алдын ала ескертуге және жоюға бағытталған ұйымдастыру-алдын алу, инженерлік-техникалық, сондай-ақ шұғыл шараларды жүзеге асырудың маңызына тоқталды.

«Елімізде тиісті сала мамандарының тапшылығы проблемаға айналып отыр. Аталған жағдай осы түйткілді анық көрсетті. Кезінде білім саласындағы бұл бағытты елеусіз қалдырдық. Енді олқылықтың орнын толтырып, гидротехник, ирригатор, жалпы су саласына байланысты мамандарды тез арада даярлауымыз керек» деді Мемлекет басшысы.

Президент Үкіметке, уәкілетті органдарға, облыстардың әкімдеріне қысқа мерзімде жаңа тұрғын үй салу және үйлерді жөндеу, коммуналдық, әлеуметтік инфрақұрылымды тез арада қалпына келтіру үшін шаралар қабылдау, күнделікті тұтынатын азық-түлік пен аса қажетті тауарлардың бағасын бақылау жөнінде бірқатар тапсырма берді.

Бұдан бөлек, Мемлекет басшысы малдың жаппай қырылуына байланысты ұшыға түскен эпидемиологиялық жағдайға арнайы тоқталды. Қасым-Жомарт Тоқаев болашақта су тасқынының алдын алу шараларына айрықша мән беруді тапсырды.

«Көктем мезгілінде қар шығару, өзендердің қауіпті учаскелеріндегі мұзды жару, қарғын су жүретін арналар жасау және басқа да қажетті шаралар алдын ала жүргізілуі тиіс. Жаз-күз маусымында өзендердің арналарын уақытылы тазалауды, табанын тереңдетуді және сағаларын кеңейтуді, автомобиль мен теміржолдардың бойындағы қолданыстағы су өткелдерінің қуаттылығын арттырып, жаңасын салу қажет. Қорғаныс бөгеттері мен су жүретін каналдар салу керек. Бұл міндет Республикалық штабқа және Үкіметке жүктеледі» деді Мемлекет басшысы.

Сонымен қатар Президент суы мол өзендердің арнасын реттеу үшін су қоймаларын салу маңызды екенін айтты. Соның арқасында көктем-жаз мезгілінде шаруашылық үшін қажетті су қорын сақтауға мүмкіндік болады.

«Табиғи және техногенді апаттардың алдын алу үшін Төтенше жағдайлар министрлігіне орталық және жергілікті атқарушы органдарға бақылау жүргізу құқығын беру керек. Мұны заң жүзінде бекіту қажет» деді Мемлекет басшысы.

Бұдан бөлек, Президент мемлекеттік органдардың төтенше жағдай кезіндегі бірыңғай әрекет ету алгоритмін әзірлеу қажет деп санайды. Оның пікірінше, бұл құжатта төтенше жағдай режимін жариялаудан бастап, келтірілген шығынды өтеуге және дүние-мүлкіті қалпына келтіруге дейінгі барлық құзырлы органның міндеттері мен іс-қимылы нақты қамтылуы керек.

Жиын барысында Батыс Қазақстан облысының әкімі Нариман Төреғалиев, Премьер-министрдің орынбасары Қанат Бозымбаев, Төтенше жағдайлар министрі Шыңғыс Әрінов, Су ресурстары және ирригация министрі Нұржан Нұржігітов, «Қазгидромет» РМК бас директоры Данара Әлімбаева баяндама жасады.

**ҚҰТҚАРУШЫЛАРМЕН
ЖӘНЕ ЕРІКТІЛЕРМЕН
КЕЗДЕСТІ**

Қасым-Жомарт Тоқаев Батыс Қазақстан облысына жұмыс сапары кезінде ішкі істер органдары, Төтенше жағдайлар департаменті, Ұлттық ұлан қызметкерлерінен құралған құтқарушылар тобымен және су тасқынына қарсы шараларға белсенді қатысып жатқан еріктілермен кездесті. Кездесу барысында Президент табиғи апатпен күреске атсалысқан барлық азаматқа ризашылығын білдіріп, олар бүкіл еліміз үшін өте маңызды, игі іс атқарып жүргенін атап өтті.

«Көп ұзамай бұл жұмыстар да аяқталады. Қиындықты қалай да еңсереміз. Осында еңбек етіп жүрген құтқарушылар, полицейлер, еріктілер лайықты деңгейде марапатталады. Бұл міндетті түрде менің бақылауымда болады» деді Қасым-Жомарт Тоқаев.



ЖАҚСЫ МАМАНҒА АЛҒЫС КӨП

Карантин кезінде қазақстандық дәрігерлер өмірін тәуекелге тігіп, елдің аманатын орындап, тәулік бойы көз ілмеді. Әр адамның денсаулығын сақтап, үміт сыйлап, вирусты жеңу миссиясын абыроймен атқарды. Дәрігерлердің мәртебесін көтеру мақсатында Астана қаласы Қоғамдық денсаулық сақтау басқармасының қолдауымен «Astana Filarmonia» залында «Жақсы дәрігер» медициналық фотокөрмесі ашылды.

Фотокөрмеге Астана қаласы әкімдігіне қарасты ауруханалар мен емханалардың тыныс-тіршілігі live форматта фотоға түсіріліп, қойылған. Әрбір кадрда дәрігерлердің мейірімді көзқарасы мен тынымсыз еңбегі анық таңбаланған. Күнделікті дәрігердің тыныс-тіршілігі туралы суреттер сөйлейді. Көрмеге жалпы барлығы 72 фото суреттер қойылды. Атап айтқанда, Астана қаласы бойынша №2 қалалық балалар ауруханасы, №2 көпбейінді қалалық ауруханасы, №7,5, 9 қалалық емханалардың күнделікті жұмысынан түсірілген суреттер көрмеден орын алған.

Іс-шараға Денсаулық сақтау министрлігі мен Астана қаласы Қоғамдық денсаулық сақтау басқармасының өкілдері, ҚР Парламенті мәжілісінің және сенаттың және мәслихат депутаттары, Астана қаласы әкімдігіне қарасты ауруханалар мен емханалардың басшылары, қоғам қайраткерлері, кәсіпкерлер мен журналистер қатысты. Көрмені денсаулық сақтау



басқармасымен бірлесе ұйымдастырған – «Sultan magazine» 4 тілде шығатын қоғамдық-саяси, ақпараттық-танымдық журналы.

ҚР Президенті Қасым-Жомарт Тоқаев: «Коронавирус індеті

медицина ғылымын дамытудың да өзекті екенін көрсетіп берді. Алдағы уақытта елімізде медициналық-биологиялық зерттеулерге ерекше көңіл бөлінеді. Өйткені айбынды әскермен бірге мықты меди-

цина да – мемлекеттің негізгі қалқаны. Бұдан былай оның өзектілігі арта түсетіні сөзсіз» деген болатын. Көрменің салтанатты ашылу рәсімінде келген қонақтар сала мамандары жайлы осындай жылы лебіздер айтты.

САЛАЛЫҚ ДӘРІГЕРЛЕР ЖЕТІСПЕЙДІ

Астана қаласының №11 қалалық емханасында 2015 жылы ашылған Арнайы мамандандырылған бөлімшесінде салалық 38 түрлі дәрігер жұмыс істейді. Әдетте барлық жерде осы мамандар жетіспейтіндіктен оларға деген сұраныс та жоғары. Осы орайда мұндай қат кадрлардың жұмысы туралы бөлімше меңгерушісі Қарлығаш Қанатқызы айтты берді.



Семей мемлекеттік медицина академиясын тәмамдаған меңгеруші дәрігердің жалпы еңбек өтілі 13 жылды құрайды. Осындай білікті мамандар енетін аталған емханада 41739 тұрғын әртүрлі созылмалы аурулары бойынша 7846 наукас тіркеуде тұр.

– Қазіргі таңда бөлімшеде 91 медицина қызметкері еңбек етеді. Атап айтқанда, олардың ішінде кардиолог, невропатолог, онколог, маммолог, окулист, хирург, ортопед-травматолог, уролог, ангиохирург, гематолог, иммунолог-аллерголог, практолог, лор-дәрігер, ревматолог, рентгенолог, инфекционист, стоматолог, гастроэнтеролог, эндокринолог, логопед, реабилитолог, врач-практик, УЗИ мамандары еңбек етеді. Бәрі де – жоғарғы санатты дәрігерлер. Бөлімше 95% арнайы аппараттармен жабдықталған. Емхананың 1-қабатында «Жасыл дәліз» жүйесі жұмыс істейді. Бұл жүйе онкологиялық дертке шалдыққандарға, мүгедектерге, жүкті әйелдерге көмек көрсету үшін қолданылады. Нақтырақ айтсақ, арнайы әлеуметтік қызметкерлер сондай науқастарға қызмет көрсетіп, олар кезек күтпей барлық медициналық тексеру, емделу түрлерінен өтеді, – дейді дәрігер.

Бүгінгі таңда аталған салалық дәрігерлердің жетіспеушілігі барлық ауруханалар мен емханаларда байқалады. Соған қарамастан қолда бар кадрлар халыққа тиісті қызмет түрлерін көрсетуде. Науқастар үйден шықпай-ақ қаралу үшін оларға салалық бейінді дәрігерлер мобильді қосымшасы ұсынылады. Сол арқылы олар дәрігерлерге онлайн-қабылдауға жазыла алады.

– Біздің бөлімшеге күніне 570-600-дей пациент

келіп, салалық мамандарға қаралады. Көбіне онкологиялық аурулар, қан айналым жүйесінің, зәр шығару, жыныс мүшелерінің дертіне шалдыққандар жиі келеді. Олардан кейінгі орында ас қорыту және тері аурулары көп. Бұл соңғы уақытта жасөспірімдер арасында көбейді, пациенттер жалпы практика дәрігерінің жолдамасынсыз біздің салалық мамандарға қай кезде жүгіне алады?

Біріншіден, шұғыл жағдайлар мен жарақаттар, оның ішінде офтальмологиялық, оториноларингологиялық және басқа жарақаттар алған кезде, екіншіден, дерматовенерологиялық бейіндегі аурулар, тіркелген жері бойынша акушер-гинеколог пен психологтың қабылдауы, онколог және онкогематологтың қабылдауы, диспансерлік есепте тұрған пациенттердің кардиолог, эндокринолог, офтальмолог, невропатолог, хирург қабылдаулары, бейінді маманның өз тағайындауы бойынша қайта қабылдау, жастар денсаулық орталықтарындағы мамандардың қабылдауы, жылжымалы медициналық кешендердің және басқа да мобильді қызметтердің қызметтерін көрсету кезінде бізге бірден келе береді, – дейді бөлімше меңгерушісі.

Емханадағы колл-орталық қызметі де дәрігерге қараларда кезекке тұрмай, тікелей баруға арналған әдістердің балама нұсқасы. Салалық дәрігерлердің қабылдауына жазылу үшін 8-7172 697185 және 87780037145 колл-орталық нөмірлеріне хабарласуға болады. Дәрігерлер біліктілігін арттыру үшін жылына бөлімшенің 10-12 салалық маманы оқуға жіберіліп отырады. Әр 5 жыл сайын олар санатты көтеру бойынша сертификат алуға сынақтан өтеді.

«АУТИЗМ. МҮМКІНДІКТЕР ӘЛЕМІ»

Жыл сайын 2 сәуірде Дүниежүзілік аутизм мәселесі туралы ақпарат тарату күні атап өтіледі. Аутизм – бұл өмірдің алғашқы үш жылында көрінетін тұрақты дамудың бұзылуы және мидың жұмысына әсер ететін неврологиялық бұзылыстың салдары. Аутизм, негізінен, жынысына, нәсіліне немесе әлеуметтік-экономикалық жағдайына қарамастан балаларға әсер етеді. Осы датаға орай Астана қаласында «Аутизм. Мүмкіндіктер әлемі» атты қалалық іс-шаралар апталығы өтті.

Аутизм балада 3 жасқа дейін байқалады. Дамуда ауытқушылық болады, салдарынан бала әлеуметтік ортамен қарым-қатынас орната алмайды. Бүгінгі таңда елордада балалар саны 500 мың адамды құраса, соның ішінде эмоционалды саласы бұзылған балалар саны – 3479 адам. Білім басқармасы осындай санаттағы балаларға жағдай жасау бойынша барлық шараларды қабылдауда. Қазір таңда 4 психологиялық-педагогикалық түзету кабинеті, 2 оңалту орталығы, 29 инклюзияны қолдау кабинеті жұмыс істейді және екі аутизм орталығы бар. Осыған орай елордада 1-5 сәуір аралығында білім беру ұйымдарының арнайы мамандарына арналған конференциялар, оқыту семинарлары, Ашық есік күндері, ата-аналарға арналған кеңестер өтті. Іс-шаралардың мақсаты – аутизммен ауыратын балаларға, олардың отбасыларына көмектесу және олардың өмір сүру сапасын жақсарту



қажеттілігіне қоғамның назарын аудару.

Әлемде 67 млн адам аутизмге шалдыққан. Аурудың пайда болу себептері туралы мамандардың нақты байламы жоқ. Бұл – толық зерттелмеген дерт, бала дамуындағы, оның ми жүйесіндегі

ауыртпалықтың күрделі түрі, – дейді дәрігерлер. Аутизм «өзім» дейтін мағынаны білдіреді, яғни бала өз әлемімен сыр шертіп, сыртқы құбылыстарды қабылдамайды. Галымдардың тексерісіне сенетін болсақ, аутизм баланы туар алдында аналардың

күйзеліске, психологиялық бір өзгерістерге ұшырауынан болады. Бұл диагнозды негізі психиатрлар қояды, басқа еш маман қоя алмайды. Аутистермен жұмыс істеу үшін баланың дамуындағы ауытқуларды ерте анықтау өте маңызды. Елімізде аутизмді диагностикалаудың бірнеше түрі бар, солардың бірі – америкалықтар ойлап тапқан АДОС жүйесі. Кей мәліметтерге сүйенсек, аутизм – бұл ауру емес, тек психикалық даму мен орталық жүйке жүйесінің бұзылуы арқылы сипатталатын құбылыс. Басқа жағынан бала сап-сау тұлға болып саналады.

Астана қалалық №3 емханасының психологы Юлия Демидованың айтуынша, шамамен 12 айлығында аутизмнің бар-жоғын 50 пайыз анықтауға болады. 14 айына қарай бұл көрсеткіш 80 пайыз, ал 1 жарым жаста 83 пайыз белгі береді. Алайда көбіне диагноз 2-3 жаста қойылады.

